

24 anak pesakit buah pinggang sertai pertandingan melukis

KOTA KINABALU: Seramai 24 orang anak kepada pesakit buah pinggang menyertai pertandingan melukis anjuran Pusat Dialisis Kebajikan MAA Medicare-Peter Mole MBE di Kota Kinabalu, Sabah pada 7 Disember lepas.

Ahli Lembaga Tabung Kebajikan Buah Pinggang MAA Medicare Tan Sri Dato Ibrahim Mezzadin turut hadir bagi menyampaikan peralatan persekolahan seperti beg, bawar kasut lina dan hadiah-hadiah lain kepada kanak-kanak yang hadir.

"Selain membantu anak-anak pesakit buah pinggang dengan memberi peralatan sekolah Tabung Kebajikan Buah Pinggang MAA Medicare turut membantu mereka dalam hal-hal lain dan salah satu daripadanya ialah dengan mengadakan pertandingan melukis bagi mengembangkan bakat kreatif di samping memberi ganjaran dalam pencapaian akademik kerana kita mahukan yang terbaik daripada mereka," jelas Ibrahim.

Sementara itu Timbalan Presiden Kanan Tabung Kebajikan Buah Pinggang MAA Medicare Aliyah Karen berkata tahun ini MAA Medicare telah membantu seramai 240 anak-anak pesakit dengan perbelanjaan sebanyak RM25,634 bagi membantu mereka membeli pakaian seragam sekolah, kasut, alat tulis dan beg.

"Sekurang-kurangnya inilah bantuan yang mampu kami hulurkan kerana kami juga ingin anak-anak pesakit meminati sesi persekolahan baharu dengan barang-barang baharu seperti kanak-kanak lain," ujarnya.

Aliyah menjelaskan bahawa anak-anak pesakit sedang membesar bersama mereka dan turut gembira jika mereka mencatat keputusan cemerlang di sekolah dan mereka pasti akan diberi ganjaran atas usaha mereka.

Pusat Dialisis Kebajikan MAA Medicare-Peter Mole MBE di Kota Kinabalu dilengkapi dengan 14 mesin

dialisis dan mampu menerima pesakit seramai 84 orang pada suatu masa dan beroperasi dalam tiga syif setiap hari Jumaat dan Sabtu yang kini menerima seramai 63 pesakit setakat ini.

Sejak 2009, Tabung Kebajikan Buah Pinggang MAA Medicare telah melancarkan Program Kids@ Medicare bagi membantu pesakit buah pinggang dan anak-anak mereka dengan bantuan-bantuan seperti pemberian beg sekolah, alat tulis dan lain-lain.

MAA Medicare yang ditubuhkan pada 1994 merupakan tabung amanah awam bergantung sepenuhnya kepada sumbangan-sumbangan daripada individu dan syarikat korporat bagi menjalankan program dan aktiviti.

MAA Medicare juga merupakan organisasi kedua terbesar dalam menyediakan perkhidmatan dialisis di Malaysia dengan jumlah pesakit seramai 800 orang di

bawah jagaannya dan menurut statistik terdapat 27,000 pesakit buah pinggang di negara ini, dengan lebih 5,000

pesakit baharu.

Untuk maklumat lanjut MAA Medicare boleh dihubungi melalui wakil

Bahagian Perhubungan Awam dan Komunikasi Emily Loh di talian 03-6044468 atau wakil Jabatan Pengumpulan Dana

Cik Liz jika ingin menyumbangkan atau e-mel ke fundraising@maa.my atau rujuk laman web www.maa-medicare.com.my



IBRAHIM merakam kenangan selepas penyampaian peralatan sekolah kepada anak-anak kepada pesakit buah pinggang.